



Notat

Frå:

Jan Erik Boge

Status for utbygging av breiband i Samnanger

Saknr/Journalnr

21/275/21/7420//JEB

Arkivkode

FE-233, FA-L64

Dato:

09.09.2021

Kommunestyret vedtok 28.10.2020 at Samnanger kommune skal arbeida for å få like moglegheiter for tilgang til fiber i heile kommunen, og at kravet til netthastigheit ikkje skal vera lågare enn det Forbrukarrådet tilrår.

Nedanfor i dette notatet følgjer informasjon om kva som status i kommunen i dag, samt om komande utbyggingsprosjekt.

Status i kommunen i dag

Det har gjennom relativt mange år vorte bygd ut ulike former for breiband i Samnanger, både fiber, trådløst breiband og mobilt breiband. I tillegg har mange hatt tilbod om DSL-breiband via telefonnettet (koparnettet til Telenor). Kravet til auka kapasitet/hastigheit gjer at det som vart rekna som eit føremålstenleg breiband for nokre år sidan, ikkje lenger er godt nok. Telenor er også i ferd med å fasa ut koparnettet sitt.

I Samnanger er det i dag tilbod om fiber på det meste av strekninga frå Indre-Tysse til Ådland. Det meste av denne strekninga har vorte bygd ut på kommersiell basis, men i nokre mindre område har det vorte gitt offentleg tilskot.

Det er også tilbod om fiber på strekninga Saga – Rolvsvåg – Solbjørg, i området Tveit – Langeland, på Sævell, i Frøylandsdalen og i Eikedalen. Alle desse utbyggingane har vorte delfinansierte med offentleg tilskot.

I dei fleste områda som ikkje har tilbod om fiber, finst det tilbod om andre former for breiband (trådløst, mobilt eller DSL). Kapasitet/hastigheit på tilboda i desse områda er varierende, og er ikkje tilfredsstillande for alle sluttbrukarane (husstandar/verksemdar m.m.).

I nokre få område av kommunen er det i dag i realiteten ikkje tilbod om breiband i det heile. Dette gjeld for eksempel på delar av strekninga på fylkesvegen mot Kvitingen.

Kva vert rekna som høghastigheits breiband?

I samband med utlysing av tilskotsmidlar definerer styresmaktene v/Nasjonal Kommunikasjonsmyndighet (NKOM) per i dag høghastigheits breiband som breiband med minimum 30 Mbit/s nedlastingshastigheit og minimum 5 Mbit/s oppstrøms hastigheit. Desse minimumsgrensene vil truleg auka i løpet av dei komande åra. Frå kommunen si side er det allereie i

dag ønskeleg at husstandar og verksemdar i Samnanger har/får tilbod om høgare kapasitet/hastigheit enn 30 Mbit/s og 5 Mbit/s.

Ved kunngjering og tildeling av offentleg tilskot til utbygging av høghastigheitsbreiband kan det ikkje stillast krav om ein bestemt teknologi (for eksempel fiber). Dersom ein leverandør/tilbydar tilbyr ein annan teknologi (for eksempel mobilt breiband) som oppfyller krava til kapasitet/hastighet, må denne leverandøren/tilbydaren likebehandlast med eventuelle leverandørar/tilbydarar som tilbyr fiber.

Planlagde/komande utbyggingar i Samnanger

Kvamnet AS har planar om å byggja ut fiber i området Hisdal – Trengereidfjord. Denne utbygginga vil verta gjort på rein kommersiell basis, og vil såvidt underteikna forstår starta opp i løpet av kort tid.

Kommunen har dei to siste åra fått tilsegn frå fylkeskommunen om tilskot til utbygging av høghastigheits breiband i følgjande område:

- **Ytre-Tysse – Barmen – Gaupholm - Øpstebø – Utskot** (tilskottssum inntil 900 000 kroner). Det er inngått kontrakt med Bergen Fiber om denne utbygginga. Delar av utbygginga er gjennomført, men utbygginga på strekninga Ytre-Tysse – Sætervika har vorte forseinka på grunn av at legging av fiber gjennom Ytre-Tysse må koordinerast med kommunen sitt planlagde VA-prosekt der. Fiberutbygginga på strekninga Ytre-Tysse – Sætervika vil som følge av dette ikkje kunne gjennomførast før i 2022.
- **Øvre delar av Gjerdsvegen (inkl. Dalane) og øvre delar av Steinslandsvegen** (tilskottssum inntil 250 000 kroner). Det er via fylkeskommunen lyst ut konkurranse om denne utbygginga sommaren 2021. Det er per i dag ikkje avklart kva utbyggjar som får denne kontrakten.
- **Kleppe – Kvernes – Skar – Litangen – Li** (tilskottssum inntil 900 000 kroner). Det er via fylkeskommunen lyst ut konkurranse om denne utbygginga sommaren 2021. Det er per i dag ikkje avklart kva utbyggjar som får denne kontrakten.
- **Haukaneset** (tilskottssum inntil 180 000 kroner). Det vil truleg i løpet av hausten 2021 verta lyst ut konkurranse om denne utbygginga. Det vil vera fylkeskommunen som skal gjennomføra konkurransen.
- **Børdalen** (tilskottssum inntil 250 000 kroner). Det vil truleg i løpet av hausten 2021 verta lyst ut konkurranse om denne utbygginga. Det vil vera fylkeskommunen som skal gjennomføra konkurransen.

Offentleg tilskot til utbygging av høghastigheitsbreiband

Dei siste åra har styresmaktene årleg løyvd tilskotsmidlar til utbygging av breiband. Midlane vert tildelt via fylkeskommunane, som gjennomfører årlege søknadsrundar der kommunane i fylket kan søkja om tilskot. Samnanger har søkt om tilskotsmidlar i dei fleste søknadsrundane dei siste åra, og administrasjonen ser for seg å halda fram med dette så lenge det er behov for tilskotsmidlar til utbygging av breiband i kommunen.

Det er også mogleg for kommunen sjølv å bidra med midlar til utbygging av breiband, og dette har vorte gjort i nokre saker. I desse tilfella har det kommunale tilskotet vore avgjerande for å få realisert utbyggingane. Dette gjeld mellom anna utbyggingane i Bjelkarvikvegen, Ådland og Tveit – Langeland.